

INUIT ATAQATIGIIT INATSISARTUNI



EM22/175

22.11.2022

Hans Aronsen

Apequteqaat aallavigalugu oqallisissaq, qanoq iliorluta aatsitassat nunatsinnut nunaqavissunullu iluaqutaanerulersinnaavagut?

(Inatsisartunut ilaasortaq, Mariane Paviasen, Inuit Ataqatigiit)

2009-mi Namminersuleratta nuannaarutigeqaarput, ingammillu nunatsinni pisuussutit uumaatsut uumassusillillu inuiaqatigiit pigisaringaat inatsisitigut qulakkeeratsuigu!

Ivittuut, Marmorilik, Qullissat, Nalunaq allallu aallartinneqartarsimasut tamatigut arlaannik peqquteqartumik aatsitassarsiortunit matuneqartuarsimapput unittarsimallutik. Tamatuma aamma takutippaa nunarput aatsitassarsiornikkut inatsisitigut sinaakutaasutigut suli annertunerusumik ineriartortinneqartariaqartoq.

Nunarput aamma nunarsuup avannaani inissisimaffia ukiup qanoq ilinera apeqqutaalluni sumiiffinnut aatsitassarsiorfinnut anngunniartarneq imaannangitsuusinnaasarpog. Aammalu piiakkat suliareqqiffissaannut anngunniartarnerat eqqarsaatingalugit piffissagaatsiamik atuiffiusarsinnaanera qularutissaanngilaq.

Kiisalu nunarsuarmi atsitassat ataasiakkaat akiisigut sunnersimaneqarneq Ullut tamaasa malinnaaffigisinnaasatsinni allanngorarsinnaasartoq takusinnaareerpagut. Pissutillu taamaattut kikkunnulluunniit piaanissamik eqqarsartunut nalilersorneqartuartarput. Ilanngullugli aamma nunami

INUIT ATAQATIGIIT INATSISARTUNI



piaaffineqarsinnaasuni sinaakutit qanoq iluseqarnerinut malinaaqqissaartoqartarluni.

Taamaakkaluartoq nunatsinni aatsitassanut pinnersaasiassanulluunniit piginnittuusutut iluanaartaruteqarnerusinnaanermik qularnaarinnilluartariaqarnerput oqallisissioortup kissaatigaa. Tamanna immini pissusissamisoorpoq aammalu tapersersornartoq Inuit Ataqatigiinniik isumaqarpugut.

Nunatsinnilu inuiaqatigiit akornannissaaq aamma aatsitassarsiornermik pinnersaasiassanillu piaarusuttunut sapinngisamik pitsaassusilimmik periarfissiinissaq ilanngullugu qularnaariffigineqartariaqarpoq.

Pisuussutit uumaatsut pillugit naalakkersuinikkut naleqquttumik ineriartortitsiuarnissat Naalakkersut ukkatarimmasuk tamanna pitsaavoq. Ullumikkumummi aatsitassarsiornermi ilisimalersimasagut annertusiartuinnarput, taamaalillutalu qanoq iluaqutiginerusatsinnik iliornissarputtaaq qularnaarniarnerani siunissami iluaqutiginnaasagut anguniarlugit nunatut aatsitassarsiuleqqaatut sakkussanikkiartorluta.

Piaaffinnut qanittumi najungaqartunuttaaq atungarissaarnikkut, kulturikkulluunniit allatigullu pissarsiaqaataasunik, isumaqatigiissutit pitsaasumik pitutorluarneqartarnissaat pingaarluinnartoq Rubinisorfimmi pisup takutippaa.

Pissutit tamakku ilinniarfingalugit ineriartornissaq pingaarpoq, naalakkersuisulli suliat ingerlataat UPA 24-mi aamma UKA 24-mi pissangassutigilereeripput oqaatigissavara.

Nunatta pisuussutaasat uumaatsut siunissami ineriartortuartinneqarlutik tamanut iluaqutaasumik inuussutissarsiutaanissaat, inuiaqatigiinnilu atungarissaarnikkut sunniuteqarluarnissaat Inuit Ataqatigiit kissaatiguarparput.

INUIT ATAQATIGIIT INATSISARTUNI



Oqallisissiamillu qaqitsisumut Marianne Paviasenimut pingaarutilimmik
oqallisissiorsimaninnut Inuit Ataqtigiiit sinnerlugit qujarusuppunga.